

**ODBOJKAŠKI SAVEZ
FEDERACIJE BOSNE I HERCEGOVINE**

**POSLOVNIK O RADU SKUPŠTINE
ODBOJKAŠKOG SAVEZA F BiH**

Tuzla , 22.06.2019 god.

Na osnovu člana 21 Statuta Odbojkaškog saveza Federacije BiH, na sjednici održanoj 22.06. 2019 godine donosi,

P O S L O V N I K

o radu Skupštine Odbojkaškog Saveza Federacije Bosne i Hercegovine

I OSNOVNE ODREDBE :

Član 1.

Ovim Poslovnikom uređuju se pitanja u vezi sa organizacijom i načinom rada Skupštine Odbojkaškog saveza Federacije Bosne i Hercegovine. (u daljnjem tekstu : SKUPŠTINA).

Član 2.

Skupština kao organ upravljanja u OS FBiH obavlja poslove i zadatke u skladu sa odredbama Statuta OS FBiH, ovog poslovnika, procedure za zakazivanje Vanredne skupštine i drugih opštih akata OS FBiH.

Član 3.

Skupštinu čine Klubovi članovi OSFBiH –koji su na dan usvajanja Statuta bili članovi saveza, trenerska i sudijska organizacija, koji se biraju na period od 4 godine, a na prijedlog Klubova, sudijske i trenerske organizacije, članova saveza. Predloženi kandidati za funkcije u Savezu moraju biti zakonski članovi Kluba. Prilikom prijema Kluba u članstvo OSFBiH, Klub ne postaje član Skupštine, nego samo član Saveza. Mandat članovima izabranim na funkcije u Savezu počinje da teče danom verifikacije na izornoj sjednici Skupštine OSFBiH, odnosno kada Skupština donese Odluku da je izabran na neku od funkcija. Članovi koji su izabrani na neku od funkcija u Savezu, u svom radu ne mogu polaziti od pojedinačnih interesa iz sredina iz kojih dolaze , nego su obavezni da jednako i objektivno brinu o interesima cijele odbojkaške organizacije. Ukoliko pojedinci izabrani u organe OSBiH ispred OSFBiH ne budu djelovali jedinstveno, redovna ili vanredna Skupština OSFBiH će iste opozvati.

Član 4.

Ukoliko član saveza koji je izabran na neku funkciju u savezu podnese ostavku u Klubu, bude spriječen da obavlja ovu dužnost u Klubu ili bude opozvan, u skladu sa aktima saveza, prestaje mu funkcija u OSFBiH ili

OSBiH sa datumom opoziva ili ostavke. Klub čiji je bio član dužan je na vrijeme obavijestiti Savez o prestanku njegovog rada u Klubu.

II SAZIVANJE SJEDNICE :

Član 5.

Sjednice Skupštine saziva predsjednik Skupštine, a priprema Upravni odbor OS FBiH i predsjednik Skupštine saveza. Sjednicama predsjedava predsjednik Skupštine, a u slučaju njegove spriječenosti jedan od članova Skupštine koga izabere Skupština. Skupština bira predsjedavajućeg javno.

Član 6.

Sjednica Skupštine, održava se najmanje jedanput u toku godine. Vanrednu Skupštinu zakazuje Upravni odbor kada ocijeni da je to potrebno, odnosno, kada to zatraži najmanje 1/3 članova Skupštine, odnosno Nadzorni Odbor. Zahtjev za zakazivanje vanredne Skupštine može potpisati samo osoba ovlaštena za zastupanje i predstavljanje u Klubu upisana u rješenju kod nadležnog Ministarstva pravde kantona/županije. Skupština OSFBiH ima usvojenu proceduru o zakazivanju vanredne Skupštine.

Član 7.

Prvu sjednicu Skupštine u novom sastavu, saziva predsjednik Skupštine iz prethodnog saziva Skupštine i rukovodi njom do izbora novog predsjednika.

Član 8.

Sjednice Skupštine su po pravilu javne. Skupština može odlučiti da pojedinu sjednicu, odnosno raspravu i odlučivanja u vezi sa pojedinom tačkom dnevnog reda održi bez prisustva javnosti.

Član 9.

Sazivač Skupštine odlučuje kome se pored članova Skupštine i ostalih subjekata predviđenih Statutom OS FBiH, upućuje poziv za prisustvo sjednicama. Skupštini mogu prisustvovati samo delegati koji imaju originalnu punomoć potpisanu od ovlaštene osobe za zastupanje i predstavljanje kluba i u lijevoj strani punomoći originalni pečat Saveza.

Član 10.

Članovi Skupštine mogu predložiti izmjenu i dopunu dnevnog reda 10 dana prije održavanja redovne Skupštine (Statutarne promjene). Za vanrednu skupštinu ne može se predlagati dopuna dnevnog reda.

III REDOVNA SJEDNICA

Član 11.

Redovna sjednica Skupštine saziva se svake godine do kraja juna, a po potrebi i u drugim terminima.

Sjednicu saziva predsjednik Skupštine saveza i njom presjedava.

Član 12.

Predsjednik Skupštine Saveza vodi računa o toku rada na sjednici i njome rukovodi u skladu sa odredbama Statuta OS FBiH i ovog Poslovnika.

Član 13.

Na sjednici se vodi zapisnik. Zapisnik vodi lice koje odredi Skupština. Poslije sjednice sačinjava se Izvod iz zapisnika koji se usvaja na narednoj sjednici skupštine.

IV RASPRAVA I TOK SJEDNICE

Član 14.

U vezi sa svakom tačkom dnevnog reda predsjednik Skupštine saveza prije nego što otvori raspravu, daje riječ izjesticu, odnosno podnosiocu prijedloga.

Član 15.

Prijava za diskusiju vrši se dizanjem ruke, a predsjednik daje riječ po redoslijedu kojim su se zainteresovani za diskusiju prijavili.

Niko ne može po drugi put dobiti riječ prije nego što su diskutovali svi oni koji su se prijavili za diskusiju, izuzev ako predsjednik Skupštine Saveza ne ocijeni da je to neophodno radi davanja neophodnih objašnjenja.

Član 16.

Diskusija svakog diskutanta može da traje najduže 5 minuta. Replika može da traje najduže 2 minute. Predsjednik Skupštine Saveza zaključuje diskusiju kada ocijeni da je po pitanju na dnevnom redu dovoljno raspravljeno i da se mogu predlagati odluke i zaključci.

V DONOŠENJE ODLUKA

Član 17.

Na samom početku Skupštine, prije usvajanja dnevnog reda, donosi se odluka o prijemu novih članova Saveza i isključenju iz članstva onih klubova koji nisu ispunili svoje finansijske i druge obaveze. Skupština u svakom momentu može isključiti svakog člana Saveza (klub) koji krši

pravila ponašanja i koji blati Savez, odnosno radi protiv interesa Saveza i odbojkaškog sporta. Za ovakvu odluku dovoljno je da Skupštini prisustvuje nadpolovična većina, a za istu glasa nadpolovična većina prisutnih.

Član 18.

Nakon obavljene rasprave, Skupština na prijedlog predsjednika Skupštine saveza utvrđuje jedan ili više prijedloga o kojima će se odlučivati.

Član 19.

Skupština može punovažno odlučivati ako sjednici prisustvuje nadpolovična većina članova Skupštine kako na redovnoj tako i na Vanrednoj skupštini. Izjašnjavanje o odlukama i zaključcima vrši se u skladu sa članom 24 i članom 25. Statuta OS FBiH.

Član 20.

Odluke se po pravilu donose javnim glasanjem, dizanjem ruke članova Skupštine. Na osnovu podnijetog prijedloga Skupština može donijeti odluku o tajnom glasanju, koje se vrši na jednoobraznom ovjerenom obrascu. Takva odluka se donosi većinom glasova prisutnog broja članova Skupštine.

Član 21.

Prilikom odlučivanja član skupštine se izjašnjava „ZA“ ili „PROTIV“ odnosno „SUZDRŽAN“.

Član 22.

Za vrijeme odlučivanja, javnog ili tajnog, niko ne može dobiti riječ prije nego što se saopšte rezultati odlučivanja.

Član 23.

Nakon završetka rasprave i odlučivanja u vezi sa svim ovim pitanjima koja su bila na dnevnom redu, predsjednik Skupštine saveza zaključuje rad sjednice Skupštine.

VI IZBORI U OSFBiH

Član 24.

Izbori u organe OSFBiH i OSBiH vrše se svake 4 godine na izbornoj Skupštini koju zakaže Upravni odbor OSFBiH. Kandidat može više puta da se izabere na neku od funkcija ako mu za to skupština da saglasnost.

Član 25.

Za izbore u organe OSFBiH i organe OSBiH, Klubovi članovi OSFBiH mogu kandidovati samo one osobe koje su upisane u Rješenju o formiranju udruženja kod nadležnog Ministarstva pravde Kantona/Županije, kao osobe ovlaštene za predstavljanje i zastupanje Udruženja-Kluba. Klub može maksimalno predložiti dva kandidata na dvije funkcije.

Član 26.

Klubovi koji kandidiraju svoje kandidate za izbore, dužni su pismenim putem originalnu kandidaturu dostaviti na 10 (deset) dana prije od dana održavanja izborne Skupštine u kancelariju OSFBiH putem protokola, radi provjere da li su predloženi kandidati zakonski zastupnici Klubova. Prijave koje stignu poslije ovog roka neće se uzimati i stavljati u proceduru. Ova procedura se primjenjuje samo za redovne izbore.

Član 27.

Na izborima se zaokružuju kandidati koji su upisani na glasačkom listiću. Oni kandidati koji su dobili najviše glasova izabrani su u organe za koje su ih predložili klubovi. Za predsjednika i dopredsjednika Saveza izabrani su oni kandidati koji su dobili najveći broj glasova. Ukoliko dva ili više kandidata imaju isti broj glasova, a njihova pozicija zadovoljava ulazak/neulazak na određenu funkciju za iste će se ponoviti glasanje. Npr. dva kandidata dobiju isti broj glasova za Upravni odbor (ili bilo koju drugu funkciju), a ona je 7 i 8 pozicija za ove kandidate će se ponoviti glasanje, a ono će biti javni. Izbori za Vanrednu skupštinu biće propisani Procedurom za održavanje Vanredne Skupštine.

Član 28.

U verifikacionoj komisiji ne mogu biti osobe koje se nalaze na listama za izbore.

Član 29.

Ukoliko neki član iz bilo kojeg kluba bude izabran na neku od funkcija, a u međuvremenu bude smijenjen u Klubu, po automatizmu mu prestaje i funkcija u Savezu, a na njegovo mjesto ulazi prvi sa liste koji je imao najviše glasova. Na prvoj redovnoj skupštini Saveza biće potvrđeno imenovanje te osobe.

Član 30.

U organe OSFBiH biraju se:

- Predsjednik Saveza,
- Dopredsjednik Saveza,
- Predsjednik Skupštine Saveza,
- Dopredsjednik Skupštine Saveza,
- Upravni odbor Saveza,
- Nadzorni odbor Saveza,

Član 31.

U organe OSBiH biraju se:

- Predsjednik Saveza (svaki drugi mandat),
- Dopredsjednik Saveza (svaki drugi mandat),
- 5 članova Upravnog odbora,
- 15 članova Skupštine u skladu sa aktima OSBiH,
- Nadzorni odbor po potrebi.

VI ZAVRŠNE ODREDBE

Član 32.

U vezi sa pitanjima koja nisu utvrđena odredbama ovog Poslovnika, primjenjuju se odgovarajuće odredbe Statuta OS FBiH i Procedure za zakazivanje Vanredne Skupštine i ostalih normativnih akata Saveza.

Član 33.

Ovaj poslovnik stupa na snagu danom donošenja, a stupanjem na snagu ovog poslovnika stavlja se Van snage poslovnik o radu Skupštine broj: 529-06/14 od 15.06.2014 god.

Broj : 1192-06/19

Tuzla , 22.06.2019 godine

P R E D S J E D N I K

Emir Alajbegović